

光緒山西通志

孝友錄四

錄四之四

山西通志弟百四十一

賜進士出身頭品頂戴兵部侍郎兼都察院右副都御史巡撫山西提督軍務張煦奉

盲監修

國朝 諸州屬

王道平字亨衢榆社人家貧力學純篤有至行父逝三年哀毀事孀母尤謹撫弟妹四人皆成立由歲貢為聞喜訓導學者稱人師以老乞歸卒

馬麟定遼州歲貢孝友端方前守沈紹祖嘗舉優行第一

馬佶遼州諸生事親盡孝又廩生劉佐聖友于可風

申福吏員州守沈光榮以孝友匾旌之又州民張行修及弟

言修相友愛撫孤姪有恩

李茂南榆社諸生父老好遊攜飲食終日追隨十餘年不懈

事母亦能養志張昇亦諸生幼孤授徒養母以純孝稱

張鳳翹榆社人家貧爲人執鞭以養其母外出必市甘旨以歸母病喘嗽遇冬輒發爲母搔抑手接痰唾竟夕不寐爲常王書遼州諸生待父疾七年不懈子死恐傷父心戒人勿哭妻牛氏事母亦得歡心居母喪哀毀盡禮父卒廬墓三年其推產兩兄迎養孀姊鄉黨並稱之乾隆中與妻俱以孝旌牛應台遼州歲貢少居父喪擗踊盡哀事繼母巨與妻程氏承歡養志母終悲號晝夜不勝喪而卒乾隆中旌

劉瑤遼州人事親先意承志母有療疾潛心調治十餘年而母病以愈州牧沈重其行沈卒於任臨終以妾與幼子相託爲經紀其喪歸柩數千里其家贈以路費不受徒步而歸郝顯登榆社人家貧母老爲人傭賃得值卽具甘旨養無

缺縣令葉匾旌其門又鄉民趙邦魁張孚謙與弟孚巽並事母以孝聞

任士重榆社人事繼母盡孝推產讓弟孝友之稱人無閒言李奪秀榆社諸生家居食貧而事父母色養備至戚黨將舉其孝行力辭之

以上  
遼州

李秦沁州廩生親沒廬墓三年祀鄉賢

劉青藜字奉若沁州歲貢姜逆之變負母避堯山若累日不火食而母甘旨不缺攜弟青選青壁履險阻兩足悉潰爛賊平督兩弟讀書不懈後胥爲名諸生少友吳文端以弟畜之文端貴視如少賤時無少加禮文端嘗嘆息言人之知我不如劉之知我也卒年七十四

秦珍沁州人早歲失怙乘隙卽至墓傍長跪號泣至暮歸家

衣衫淚透不使父知人皆憐之流賊敗逃至境執其父以去  
叩頭乞命賊爲感動父病籲天求代比沒哀毀骨立獨宿三  
年妻死不再娶鄉里咸高其義乾隆初旌表入祠

楊春新本姓李州人楊械義子也乙丑之變父卒未葬兵猝  
至家人悉走避春新獨守父柩不去被執至營有老兵憐而  
夜釋之使速遁春新既得脫疾歸視父柩則尸已暴於地痛  
哭解已衣斂之赤身坐號其側遲明兵復至老兵見之大驚  
嘆曰此孝子也相戒勿犯子四並諸生孫尤奇官編修  
姚哲沁源人父企崇任渭南縣丞明末殉難哲乞食入秦晝  
伏夜行卒得父尸以歸後由舉人官屯留教諭

郭郃沁源人闖賊之變父爾翼母鄧以宦裔追餉被俘入秦  
置之鎮安郃年甫童既得耗罄家資獻賊贖歸鄉居三十年

奉養備至及卒喪葬盡禮後由貢官儀徵縣丞

趙夢鯉武鄉人父廷舉明末殉寇難夢鯉方以供事在都謁選前二日忽夢父心動卽馳歸中途聞耗一痛幾絕居喪毀瘠無復生意終身不仕

程乘龍武鄉人父死寇突至從容殯斂號哭盡禮賊異而問焉指櫬嗚咽曰父死不斂非人棄父得生猶死賊以爲異呼衆共舉瘞之酌酒致奠而去

程偉績武鄉諸生侍郎啟南子也闖賊勒餉代父受繫驅入關中會賊相牛金星爲舊識縱之得生還

李若桂武鄉人父浩然順治初官軍過洪水村村人譎傳寇至父浩然倉猝偕衆禦之旣而提刑司按捕若桂不忍父之罹於法也號泣廳事下祈以身代縣達其事遂與村中九人

胥解京罪皆棄市獨若桂以純孝蒙

恩獲免歸奉父終其身

趙御封武鄉人姜瓌之變奉親避兵猝爲所執不屈遇害後有兵至憐之將其父母妻子俱放還

王永宜沁州人幼孤母張矢節撫之與弟永善並善承母志兄弟自相師友愛敬交摯人無間言

吳道凝沁州人康熙中歲貢幼遇亂與父兄相失獨奉母避地備歷艱辛而母無所苦難旣平骨肉復聚後父母相繼病卒與妻劉氏侍疾居喪竭誠盡禮時稱純孝

劉瑞沁州諸生幼失怙兩事繼母俱能得其歡心家貧資授徒爲養從弟珍死子鬻他姓贖歸之有兄早逝恩育其子孫不幸俱夭鬱鬱成疾遽卒乾隆初以孝友旌

吳時諫沁州拔貢文端公季子也母宋病夜必五六起事兄進士時謙甚恪終身無私蓄歲荐饑捐粟三百石散賑又設徐村義學里人德之舉孝廉方正遽卒

時鵬程沁州人目雙瞽習爲壬遁之術賣卜得錢輒易甘旨以遺其親父老艱於步履每出輒扶掖或負以行見者憐之後挾術遊太原頗饒於財每親忌日必歸展墓風雨無阻一妹孀居無依養之終身

李生穉沁州人宛平石港口巡檢父沒廬墓三年又弓玉珍亦以廬墓稱孝後皆獲旌

牛映極沁州人幼喪父事母孝因多疾遂精於醫康熙戊寅大疫立方施藥全活甚衆母病沒哀毀過甚舊疾復作以母亡不復自醫竟卒於苦次



胡應乾沁源廩生父宸以武舉官廣東守備卒於官弟御乾亦客死柳州會三藩叛路梗應乾先歸弟柩及亂稍定復至廣州而從兄世乾已他道扶父櫬歸里乃兼程返抵家號慟幾絕既葬遂以哀毀勞瘁不勝喪卒

武錄長武鄉廩生父兆麟官沂州同知沂多逋賦錄長賣地二頃得三百金代輸父大喜父沒家日貧舌耕以供佐之進母饑必豐必潔母病不解帶五十日比沒三年不入室性狷介終歲不履公府然督力請復屯米又建石橋文昌閣沒後五十餘年縣人稱孝義者曰武齋長

魏名雯武鄉人父崇奎官興縣訓導卒於任名雯扶柩歸身守殯所妻孥罕面免喪又淹二年始克葬葬畢乃歸家趙簡夢鯉子也諸生食餼事繼母以孝聞居父喪三年不入私室

雍正中旌

武光前武鄉人力耕養親母疾廁牖中裙必親澣濯嘗路拾遺金知爲權店驛所齎官物立俟還之乾隆中以孝義旌其先後旌者有諸生李炆孝養父疾武習路母喪廬墓

魏峒武鄉人事繼母數十年無違言母沒遺弟三俱幼教養兼至學使蔣嘗旌其廬史耿光拔貢事兄待弟曲盡禮誼並爲鄉里所欽

吳樹勳沁州諸生文端公曾孫事親先意承志臧獲事皆自爲之侍疾居喪盡誠盡孝歲時奉祀極虔至書生時飲食嗜好躬親蠲潔篤於宗族婚葬有不給竭力仗助鄉里觀感以爲克繼其家聲焉

楊埭沁州人事祖父母及二親曲得歡心撫弟妹恩誼並至

親沒罄貲營葬諸弟議析遺產悉推讓之率二子墾荒於山每行先謁墓痛哭而去歸亦如之年七十不改鄉里佩其純孝又靳克欽亦以孝友為一時所稱

趙彥邦沁州武生家世業農而事親溫清定省動合禮經里有不孝子嘗入其室值午餐彥邦延之上坐與父同食捧盤進饘僕偃出入終食旁立無僂言其人大愧含淚出自此改行鄉人以為真能錫類者

王圯魁沁州人生有至性少時因父疾禱神得愈絕葷酒者數十年父老患足疽醫云敷百蝦蟇可療否則需人肉塗之圯魁云吾方為父祈福可多傷生命耶乃自割股肉大如掌煨鍊以進不五日而瘡平

李萬年沁州人母手生癆詢諸醫醫謂敷人油可痊萬年遂

割股肉煉而敷之忍痛承歡不令母知

郝廷佐沁州人以武舉給事撫部麾下嘗委署擱車鎮千總檄甫下聞父疾卽告歸母卒柴毀幾殆遂無復仕宦意父再娶事之惟謹及遭父憂繼母亦逝哀痛迫切竟不勝喪年四十六卒鄉居多行義咸悼惜之

陰顧天與弟順天並沁源諸生母張氏晚年病痿兄弟竭誠侍養數年不懈每夕各額神祈代母卒事父益恪子職已令以孝乎惟孝榜其門又貢生陰德範善居喪事繼母有聲郭鳳池沁源人父瘍生於首危甚有言得人脂爲膏敷之可療者鳳池乃託負薪入山割股肉鍊治如法攜之以歸詭言道士所贈塗之卽效數日全愈縣令聞而嘉獎之一時名流多爲詩歌紀其事

史爾安沁源農家子力備養親父頸生疽俗名對口醫多不治爾安日夜哀籲於神未幾遂愈人異之閱年餘同作苦者見其左股少肉瘡痕甚鉅詢之不答乃共喻爲療親所割也道光中邑令蔡匾旌其門

魏大壯武鄉諸生早失恃繼母性悍偶失意詬挾交集大壯怡顏順受百方以博歡心母卒嘗語戚友曰人止知吾母嚴厲難犯然自母持家未嘗有外侮吾受庇多矣今欲求再庇何可得乎語訖猶呱呱作孺子泣云

閻雲會武鄉人親沒廬墓泣盡繼以血子汲三諸生亦以廬墓稱孝

李仙標武鄉諸生父久病時嘗糞以下休咎母陳雙瞽日侍起居無少怠兄嫂偕亡撫其孤如已出於戚黨仗助婚葬在

行旅拾遺金從無德色乾隆中旌

武師吉武鄉人父客粵之遷江久不歸師吉髫歲時問母遷江何在兒欲尋父甫成童竟結伴往遇父洛陽相將歸逾年父病卒哀毀特甚事母以孝聞

魏繩祖武鄉廩生幼不逮事父奉母備極色養食必侍寢必偕或母命之去旣出猶徘徊戶外若牖下俟母醒問所需然後去數十年罔間至今人猶樂道其事

武維邦武鄉人與妻張事繼母甚謹母生子乏乳張節已子乳以哺之父沒家綦貧暑月維邦外宿夜半雨大至心動跣奔至家見屋穿敝急負母趨鄰舍妻亦隨出回顧屋已傾矣又嘗爲母壽執爨於室雷電大作候霹靂一聲人見火光自其室飛出咸趨視則戶牖有燬而維邦無恙人皆異之

蘇安邦武鄉諸生與縣人武達孝侍父疾並稱誠孝魏玉柱石毓璋寶鼎並事繼母不異所生郝會元羸糧尋兄孝友咸

推以上沁州

張石麟平定諸生父三謨官御史親喪廬墓三年石麟亦博學喜士善古文詞父卒哀毀廬墓人稱世孝

耿丹字子真平定人為諸生偕其弟胥以孝聞家甚貧廩餼不能贍則舌耕以為養年踰六十母喪猶孺子啼不止廬墓

朝夕奠三年不忍去後以歲貢官榮河訓導

柳鎔壽陽監生天性孝友崇禎末闖賊追餉兄錦姪某俱繫獄中賊以錦舊令平山捐助不足必欲得而甘心焉鎔不忍其均斃遽令己子淑孔代之賊知其情亦為感泣竟得釋

武更新壽陽人家貧事養母曲盡色養母年至九十有六終

始不渝人稱孝子

邢繼昌壽陽拔貢父性耽弈至忘飲食繼昌每懷食隨之父以年老受戒爲假神籤勸解飲食如初遇父所啖吐之物拾取自嚙不以爲污居喪三年悉準古禮年過七旬孺慕不衰閻順字孝純孟縣歲貢善事父母父病嘗糞以驗痊否父母繼沒廬墓凡六年治喪循古禮建祠堂出入必告又建五倫閣繪圖於壁知縣蔡璜記之著小學衍義務實編諸書

趙法汴孟縣諸生幼喪母事父及繼母以孝稱祥琴後遇忌日必詣墓攀柏哀號析箸時田廬什器胥取其瘠敗者

王績先孟縣人十歲從父避地遇賊於塗父爲賊執績先捫懷曰金在是能釋吾父金可盡得也父去探懷中裁二銅鎖賊怒甚旣而義之獲免嘗步園畔見有盜果者急引身避之



曰吾不欲以細故敗人名也邑故家鬻女爲人婢典衣贖還之子孫多以科名顯年九十三卒

賈榆平定人以孝友旌

張煜平定廩生父沒廬墓側每夜哭鄉人聞者爲墮淚又劉鍾母喪廬墓由副貢選靈石教諭未任卒

曹立極平定武生兄立德遠出無蹤變產得資爲乞匄狀遍訪數年遇於涇州偕以歸又廩生劉洲嘗入閩求其幼弟並爲戚里所稱

王晞平定人家窶鬻薪奉母妻失母歡出之終身不復娶竇克青平定人賣餅爲生事親甘旨必備曲得歡心有買其餅者問所與曰奉親卽與十餘枚不取值人問之曰吾賣餅數十年多以餌兒而此子獨奉親故以贈也以是人尤重之

李複樂平歲貢幼孤事母備極色養康熙丁丑歲祲以母命  
罄所積粟散之鄉里雍正中舉孝廉官至灤州知州弟馨死  
援漢人期喪去官義卽日告歸馨諸生亦事母孝

王相樂平人父沒廬於墓側後遭母喪值歲歉殯葬無資號  
痛七晝夜不食死

魏珽平定廩生母疾竭誠侍養諸生李泰樂平人侍疾居喪  
孝聞鄉里又李朝瑞任瑜並州人歲貢趙秉城廩生李雲文  
諸生路凌霄鄉民秦威並籍樂平皆事親克孝兄弟友愛又  
樂平諸生張受休亦善事親居鄉多義行以耆壽終

王仕廷壽陽人家貧備力奉母生不知書動合禮則母沒三  
年中不處內值忌日輒悲慟不食新穀既升必持獻墓前數  
十年爲常朱文正公珪時爲晉藩匾旌之卒祀孝弟祠

趙延佐壽陽廩生訓讀養母甘旨不給鬻田以供居喪柴毀  
盡禮學使景匾旌其門安垸亦諸生事父有伯俞之孝母沒  
父繼娶奉之甚謹先父卒以不克終養遺命其子薄葬示罰  
乾隆中旌表入祠

郭英孟縣人事繼母曲得歡心傭販以養得錢輒致甘旨巨  
令蔡璜聞而賢之親表其門又副貢劉赤生嵯峨知縣于奎  
並事繼母以孝聞

孫侶孟縣人居親喪先後廬墓六年歲貢李廣慶諸生李奇  
光並以廬墓稱孝王恒縣民也孝事孀母母沒終身縞素

唐登雲平定人父卒於蜀家貧喪不能歸晝夜號泣妻竇氏  
貸於母家得黃金兩許乃獨步往負骸歸

延爾福平定諸生父病危每夕露禱祈以身代夢有告之者

曰上帝嘉汝誠賜汝父壽一紀後如所言爾福亦旋死州人多爲詩文以表其事又諸生劉名山事母亦以誠孝聞老年嘗作哭母詩人多誦之

柳滋翰平定諸生少孤事母孝處羣從閒多風義子奎光諸生璧光以貢官有玉訓導並以孝聞

侯景韓孟縣諸生僑居陽曲父死於盜厯訴府州閱歲捕得盜既正典刑瀝血祭父扶柩歸葬廬於墓所三年乃反趙發晉孟縣人事親承顏愉志扶持抑搔靡所不盡父病祕結醫無效發晉至以舌舐殺道潤澤之

王維垣孟縣人父以殺人遣戍福建維垣偕兄維翰維則送之既抵浙父令兩人歸一人侍兄弟爭留不決父日籍諸生者歸支門戶維垣遂隨父入閩父卒扶柩歸悲號之聲哀感

山西通志卷一百四十一 孝友錄四  
行路後維翰成進士維則舉於鄉

王肇基孟縣人年十三喪父以哀毀得顛疾既葬時繞墳狂呼家人患之忽遇緋衣人導至一處覺遍體清涼醒乃在井中汲者引出遂愈後以諸生終

王化龍孟縣人幼貧隨衆力作輒採野蔬鬻之易果餌歸奉父母父臥病以一生未出孟境爲憾化龍既葬父傭食四方以木主隨足迹半天下每至一處必啓積告曰此某府州縣也母享大年卒化龍年已七十猶作孺子泣

呂駿二孟縣人性癡人因以駿二稱之幼孤貧業菽乳以養母得錢必市甘旨及時果以進或母與鄰媪談卽邀與同食或負之出遊以娛其志

李生信孟縣人給事縣庭性孝一日自鄉歸囊棗奉母忽有

虎自叢薄出同行者戰慄而號生信曰吾等無負心事當不罹害虎耽視良久逕去

田鴻烈孟縣人以孝行獲旌王澄副貢與妻劉氏事親承歡盡禮趙晉忠趙玉珩並敦孝友石如琿王鶴聲並以善養稱其以廬墓著者有諸生李宗季邢俊千總武祺錫附貢鄭建榮及縣民田醇

張耀西平定人嘉慶辛酉舉人父令松滋母卒扶柩歸晝夜號哭竟以毀卒於舟中楚人王菊門爲作殉孝張公子傳蔡九齡平定拔貢母教甚嚴年踰四十猶時受責一日酒醉失儀母佩之玦令戒酒自此終身不飲及病有勸服藥酒者泣然曰母命不可違也

武國棟平定賈人子也父由都門病歸沒於保定僧寺國棟

年甫十二罄資以斂哀僧求隙地權厝之插柳爲識歸後鬻薪自給聞州牧將解綬東歸投身爲傭行視厝所柳蔚然矣遂扶櫬歸白登祥者父沒京師迷其葬所日號泣於叢冢間昏憤中聞人語曰尋父骨何惜一陌錢耶醒而四顧無人異之急市香楮焚祝風颺起紙灰集一冢而盤旋焉從而掘之得骨一具棺朽敗無題識乃嚼血塗骨屢塗屢入遂負歸人咸謂孝感

廉萬榮平定人父娶數月遊遼東不反萬榮生不知父稍長詢母得故大痛矢志往尋出關遍訪蹤迹年餘得相見其父自謂無子不敢妄認萬榮乃出父當年所用手器爲證始相持而泣遂偕歸又張登亮乞食尋父遇虎傷其左臂奄息側臥路旁有道士敷以藥逾時立起渡遼河溺水幾死又遇賊

縛置樹間將加刃樵人解而縱之跋涉數千里卒與父遇相  
偕而返

王瑞星平定人年十二口生奇牙相者曰妨父母歸以利錐  
自刖其牙痛極而暈家人始知之父沒後成進士每當公車  
北上向母含涕而別與諸弟友愛備至

董勤方平定諸生咸豐中父遊幕廣西卒勤方聞訃號泣南  
行崎嶇兵火問扶櫬歸里壽陽祁文端公作歌以紀之  
祁文綱平定人同居五世雍睦無間言猶大同器而食人以  
爲和氣所感史懿修及弟肇修穆添安胥以孝友爲鄉里所  
推又耿文煜魏連城事父並稱善養

王德中樂平鄉人事繼母以孝聞父客塞外久無耗覓以歸  
竭力侍養始終無間郭瑒亦襄人子徒步出塞尋父還鄉兩



人皆童年人盛稱之

趙其堂樂平人篤於孝友待羣從恩誼甚至道光乙未歲饑出粟遍貸鄰里

范懷瓏樂平人親沒廬墓與弟友愛備至

郭鶴齡壽陽人道光壬辰舉人性至孝母患風痺晝夜扶持牀褥污穢皆親滌拭不令妻子代母沒泣思不置至於失明于入海壽陽人貧無以爲家母子相依一樣侍養勤劬鄉鄰感歎母壽百有九歲卒入海已八十八矣葬畢朝夕哭奠七日而卒

張升秀壽陽恩貢性謹厚事母至孝母年七十頭生疽危甚旦夕悲禱所減已年增母壽時母昏憤不能言數日矣忽呻吟曰冥司賜我陽算二紀兒勿憂也自是漸愈壽果踰九十

祁文端公嘗贈以詩盛推之

杜宗預壽陽圻者家太安驛母病割臂肉療之劉孝廉需作太安行以賦其事咸豐中軍興其從子郁華哀所積百金輸餉曰以是區區當獻曝耳不敢邀議敘也縣令黃歎息以爲忠孝出於一門云

郝步蟾壽陽人道光甲辰舉人居孝友工書精於布算侍母疾勞瘁過甚居喪以哀毀卒

張生福壽陽人本張氏養子傭力奉母得錢輒市甘旨以歸不給時或行乞村舊有狼患而生福昏夜往來狼隨之不相害人以爲孝感

高鴻文壽陽人母病疫藥需蛙臍值嚴冬鑿冰探水得之調以進遂愈其後鑿冰處經冬不凍土人異之號爲溫保泉有

族人以貧鬻妻資給之使完聚卒祀孝弟祠

李振陽壽陽廩生與縣人郭守恕王希賢並以侍疾居喪著純孝聲賈福喜販鬻事親母沒廬墓道光中以孝旌諸生郭汾裔亦嘗廬墓縣令匾旌其門

崔茂才孟之庖人也每爲人治饌必請於其主分珍食以遺母蔬果入市輒先購歸享用之腆雖世家不啻也母沒廬墓三年道光中旌

馬龍泉孟縣副貢授徒養親父沒柴毀不勝喪卒於苫次

李熙孟縣監生童時父客死遼東無耗感異夢心動適有賈於遼者隨之去遂得扶柩歸事孀母撫弱弟孝友同推

吳悅甯孟縣人幼孤事母甚孝恆侍寢席不入私室母卒廬墓側母生時常患疴瘵每憶及輒手搔墓土十指血出淫淫

然鄉里欽之公舉孝子

王泰孟縣人母方娠父客遊臺灣不返泰年十八請於母貸資走訪既相遇而父無歸意泰泣請不獲歲餘囊資既盡乃傭力自給傭已輒呼天號泣臺人感其誠聞於官官召其父以威脅之乃與俱歸孝養終身又有高鉅者嘗徒行尋父後得之遼左偕歸

李振鏞孟縣人貧不能娶與母相依母老病臥牀奉櫛盥易燥溼飲食皆手舉以進母年踰九十乃卒

孫書田牛紹義趙大章田江武宜先廩生張作儀附貢劉道昌庫大使史緯光並孟人先後以孝旌諸生張克儉孝事祖父及其二親監生楊輔德諸生郭肇基並事繼母如所生王憲章幼孤事母撫弟克竭其誠監生張孔修亦善遇弟監生

王士奇及張登高並以敬事其兄為鄉人推重以土平定州

李友直忻州人事繼母克盡孝道每有所往負之而趨值母病篤嘗糞甜苦致神人賜瓜之異後以孝旌

石含鑑定襄人母卒悲慟嘔血幾至滅性父文煥勸諭再三稍為節哀殯葬如禮日侍父側曲得歡心

韓士章定襄人家貧而養母膳甚腆不使知罍無儲粟也母沒典身營葬事自斂暨處無缺禮居父喪草土中形容枯槁見者皆稱其孝

薄良珥定襄諸生事父母孝妻王氏亦克相之母韓膺疾且殆醫罔效良珥日夜禱願以身代忽夢人語曰爾母非人肉不療良珥瞿然即割股以進疾尋愈已而父珍病篤復割股如前亦愈後父母胥年八十於邑令趙學使高均匾旌焉

馬雲靜樂人母病醫藥罔效有言人肉治疾者奮然起曰一死能活母尚不辭況未必死乎因鼓刀割肉以進母食之立愈縣令歐鴻匾旌之

宿振義忻州人母楊氏病嘗糞甜苦哀籲神明病尋愈人以爲孝感

張玉秀忻州諸生父病醫窮於術秀聞五臺山有香泉可療疾遂日夜步行二百餘里汲水至父飲之病良已後侍母病醫言飲生人血可療秀立刺血匙進亦愈

張新芝忻州人體殘廢恒手足並行乞食奉母每得佳餌忍飢留供母食得錢亦別儲爲母衣履歷二十年如一日母沒棺歛悉具皆平日匄乞銖積所營備也及葬泣告族人納已壙中衆驚詢則曰吾苦生久矣不死者徒以老母故今母已

逝豈可贅疣人世以口腹相累乎衆強扶歸終不食而死  
石連城忻州人幼孤事母孝母老多疾侍寢席十有二年無  
少懈一日醫至言疾不可爲連城力請立方且決必愈醫問  
故囁嚅而對曰糞尙苦醫愕然治之果減逾歲又劇復嘗之  
泣曰茲不可爲也糞甜矣母旋卒哀毀迫切見者爲之掩泣  
道光中旌表入祠

王侃忻州人父三義客豫十餘年無耗侃旣授室貸資婦家  
徒步往尋遇於宜陽偕歸傭力養父以終獲旌入祠

張新禧王作梁並忻州人事繼母以孝聞宿天德幼孤服買  
奉母子明如舉於鄉

張九武定襄人順治初父朝柱殺人應抵九武銳身詣有司  
求以身代父得釋歸九武竟死於獄時年十九其弟九昌等

三人痛兄之死爲起墳有羣鳥銜土助之人咸以爲孝感  
樊灝定襄人事親純孝十歲喪母值賽日亡來歲舉賽灝感  
念悲號聞者爲之罷賽繼母牛嗜棗有棗結實母命守之每  
暴風雨灝輒抱樹而泣風雨頓止遭父喪哭輒吐血三旬之  
內絕而復甦者七有白鳥數百集棗盧候哭而來哭止而去  
遠近傳其異其後有王玉光者與兄友愛備至門庭雍睦無  
間言犬爲人竊去雞哺其子人謂和氣所致云

薄岩定襄歲貢侍父病竭誠盡養官廣靈訓導又趙葵事孀  
母極得歡心

智增全定襄人生二歲父出外不返旣長以補鍋爲業操業  
以遊迺父於遼東迎以歸奉養備至

趙一誠定襄人父老多疾竭力侍養不離寢側者二十餘年



與兄終身無違言從叔某有顛疾迎至家調治得痊旅中有貧而鬻妻者集資助之夫婦完聚

李映龍靜樂人家貧傭工養親父老嗜酒得值則沽以歸並甘旨無少缺父亡哀毀幾絕令節及生忌日必哭奠於墓哀感行路同縣韓周藩廩生馮錦花並善事親侍疾居喪鄉黨稱孝

侯進璋忻州人父客遼左二十餘年無耗家貧傭販以事祖父及母及授室生子乃決計尋父出塞蹤迹不得輒轉稽詢年餘始遇於甯古塔之十道梁遂偕歸徒步萬里險阻備嘗見者皆爲感泣後以孝旌

焦潛修忻州諸生母疾侍湯藥三年時嘗糞以卜安危母沒事繼母亦如之又潘萬錦親疾嘗糞居喪廬墓側穴居二十

餘年州人石皓皆爲之傳後並旌表

王生榮忻州人少孤事母盡孝母老目雙瞽侍側十餘年恒伺意旨所向以博色笑母卒喪葬盡禮終制哀慕無已遘疾卒嘗有客民負瞽母行乞生榮時周之其母死爲買棺以葬人稱爲錫類同治中旌

張樹儀忻州人少孤貧依舅氏以長旣力學爲諸生因母老病遂棄舉業朝夕奉侍至嘗糞甘苦事舅氏如父舅沒時家漸落鬻產經紀其喪學使黃知州戈皆匾旌其門

郭王庸忻之賈人子也生未見父母亦早逝依祖母以長詢知父客蘇州欲往尋念祖母老又貧無資中止後聞父已死大痛乞食至蘇徒步負骨歸

楊生榮忻州人父及叔隨祖父並賈新疆久不反生榮旣長

備力養母以孝聞母沒積備值得十餘金誓尋父有中表商  
烏魯木齊者隨之往既與父遇始知祖父沒於喀城叔淹留  
葉爾羌相隔又數千里乃踰天山尋得叔同赴喀城啓祖父  
櫬卒父子三人相扶以歸當父出門時生榮方娠至是廿餘  
年矣里人嘖嘖稱之同治中以孝子舉

劉允恭郭利仁並忻州人俱善事母侍疾居喪克竭其誠  
樊必達定襄監生事親盡極孝養歲饑出粟五百斛以賑  
梁濟輿定襄諸生兩事繼母皆得歡心子契孔舉於鄉述孔  
成進士同縣李彥俊侯運達石秀元事繼母皆以孝聞

邢達順定襄舉人擢孝廉方正性至孝父嗜瓠絲每食呼與  
共及父沒終身不食瓠絲湖族中孤貧子時賙恤而教督之  
多有奮興於學者官岢嵐州學正訓士悉本躬行稱人師云

樊崇祖定襄人與妻鞏氏事親曲盡孝養王九思服賈養母行年六十而有嬰兒之色待叔雍睦盡禮學使龔匾旌之又丁養元監生親沒孺慕不毀

王夢蘭定襄人孝事孀母母晚年病目遂瞽夢蘭日舐之久而復明喬名升附貢亦善侍疾

陳希濬靜樂人事母孝撫弟姪曲盡恩誼

以上忻州

龐泉代州諸生父早逝家貧授徒養母母沒既葬搆草舍於墓側日就館課徒晚必省墓寒暑無閒三年如一日焉

劉允祚繁峙人順治中以選拔貢太學謁選得教諭將之官見母垂涕問之母曰吾不忍離汝也允祚爲惻然罷行奉母終身不仕

李勛時崞縣人性孝友多智略兄旦時死姜逆之難母痛甚

勛時委婉慰順撫愛孤姪偕村人嚴守禦時妻逆雖平餘黨猶嘯聚昔之殺旦時者三人在焉勛時計擒之誠以祭兄靈賊望風而靡不敢復至諸村倚爲保障以貢仕陵川訓導鄭斌選五臺人康熙壬戌拔貢少孤事母至孝教授生徒成就甚眾

趙能恭嶧縣人家貧力作養親日得值悉以供甘旨康熙中眾以孝子舉令召至詢其孝行奚似對曰食力窮民不知孝且不能孝是舉者誤也令大奇之匾表其閭

梁宗繁峙歲貢父卒構草舍墓旁獨居三年壯歲喪妻以有子遂不復娶同縣郭嗣元事母盡孝學使劉鳳旌之

趙全璧代州人幼喪母父以家貧謀食於外全璧寄養外家傭工自給既娶婦遂出關訪父厯東西口往反者再卒無耗

歸感念涕泣婦李氏故賢正色曰涕泣何益終尋之可也乃復行誓不見父不反徧歷沙漠年餘無蹤仍抵宣府貲既竭丐食於途偶憩關廟遇一老者操代音詢之則父也相持痛哭廟僧感其事贈以資扶攜而歸

劉懷宗代州諸生幼喪父母寄養於叔長事叔甚謹父遺產爲叔蕩盡從無怨言舌耕以事之終身

張國華代州人服賈養親父病禱於神而愈遂終身長齋不御酒肉晚年兄議析爨度不能止推腴產讓之鄉居扶困濟危甚有行義

馮爲憲代州人生有至性姊適萬全母往視驟患風痺爲憲御以歸每夕次旅舍輒顙身祈代將抵家割股肉投糜中母食之遂瘥

王子龍五臺人甫脫襁褓父藩卽出外三十餘年無音耗子龍一日變產遺母度足以養隻身走豫尋訪期年無蹤由豫入陝復赴蜀歷七年始遇父松藩鎮獲偕歸未幾母病沒父繼娶孝養不懈

張良知五臺人家貧傭身以養孀母甚有孝聲母死營葬畢泣然曰吾僕僕爲人役者以母在耳今已矣安能以七十翁伺人顏色偷生哉遂縊死

張炳五臺人父病痿臥牀不起炳跪而進食負而登廁孝養數十年如一日初艱於嗣年踰七十乃舉一子人謂純孝之報云

張誌崞縣武舉事孀母色養備至母沒廬於墓側往來者時聞哭泣聲墓前枯樹忽榮有狐集其上乾隆中以孝旌同縣

梁廷晉安都並以廬墓稱孝

曾有富崞縣人少孤事母以孝聞母老失明竭力侍養母忘疾苦撫孤姪亦曲盡恩誼族黨爲勒石表其懿行孫佩鞏舉於鄉

韓景愈繁峙人父沒廬墓田夜號泣三年喪終乃歸

王敷錫代州諸生父沒柴毀盡禮事母怡志養和曲竭其誠有弟久析居蕩其產仍均已資給之

馮偉代州人事母孝兄遊宦於蜀病沒徒步往歸其喪

張春林代州農家子事母至孝道光初母病危春林傍徨無措籲於神剖股和藥以進病良已

馮立山代州人少孤母范以節著性嚴肅立山事之惟謹察母色稍不豫必長跪請罪得歡乃已年已頽白猶依依如孺



子母卒哀毀幾至滅性

韓國棟五臺歲貢父病痿侍養十一年朝夕無怠喜獎後進從遊者甚眾年八十三卒

任壽鳳崞縣恩貢侍父疾視藥嘗糞額天願以身代父沒喪葬盡禮與羣從親愛終身共爨

張鳳翔崞縣武生父喪廬墓晨夕泣奠三年不輟

申以孝崞縣人家貧父有股疾凡動履必負以行疾篤額天泣禱母病亦如之由舉人授夏縣訓導梁中牧甲辰舉人事親居喪時稱純孝

趙如阜崞縣人父疾晝夜禱祈及居喪哀毀嘔血死妻王氏亦以身殉焉時稱一門節孝

陳玉連崞縣貧家子父沒於黔玉連行乞覓父骸至黃平州

徧訪市月始悉父殯處仍恐有誤滴血驗之負歸與母合葬焉同縣趙國城父沒於秦亦行乞負骸歸葬鄉里

狄應隆崞縣人居喪哀毀廬於墓側

解捷崞縣農家子兄嫂相繼沒遺孤未彌月捷令其妻張親乳之而別募乳媪令字已子及長愛之亦逾已出云又鄉民郝正泰嘗割臂肉療其叔疾人皆義之

宮玉衡繁峙諸生事親以孝聞兄玉鏡年老矣有九子時以食指衆多爲慮乃與兄議析產爲三以二與兄而已取其一曰兄子猶吾子吾何忍令不給哉兄善自愛勿多憂也聞者嗟異

梁茂林繁峙儒家子母沒未葬道光己亥八月所居沙澗驛山潦驟漲水及其室家人咸走避茂林攀母柩大哭不忍去

頃之水愈至垣窗盡頽柁搖搖欲動者屢矣而屋柱屹立不少欹竟以無恙人稱孝感

馮福基代州人父焯官瀋山縣天堂巡檢調淮肥軍營福基侍母留天堂年十四讀經書傳注多解悟以孝聞咸豐七年同母避賊以計脫其母而身被擄至黃梅夜宿藥肆陰置毒飯中斃賊十七人已亦仰餘藥血出賊酋見而不疑遂委之去有劉士扶者屬寺僧舍之因乞劉附書訣家人毒發死天堂人義之輿尸歸歛以棺服葬瀋岳之麓栗子原同治元年巡撫李續宜以童子智烈奏奉

旨旌卹入祠建坊獨山莫友芝表其墓爲孝烈童子或又稱

智烈孝子云

以上代州

焦昌運河曲人順治中貢生知縣吳嘗匾旌其孝

高之麒保德廩生居母喪哀毀成疾卒知州蘇匾其門曰眞孝子

徐煜保德人父隸營伍康熙間調征噶爾丹名在遣中煜方應童子試痛父年老請身代之凱旋歸子開第旋成進士人稱孝德

韓宗聖河曲監生幼時父走肅州十年不歸宗聖長蹤迹所在出關貿易致富奉父旋里嘗捐貲開得馬水渠灌溉之利一村賴之

魯開祚河曲監生父陷重辟冒死陳寃減罪改流隨至戍所調護甚至及卒扶櫬歸葬

閻慶長河曲諸生家貧授徒鄉里資脩脯養母母年百歲以人瑞奉

旨建坊母沒慮於墓盡哀同治九年以孝旌

苗士華張匯杜培春常敬呂承基張德新並河曲歲貢以孝

友著又歲貢白有光廩生李毓英從九韓鉞皆善體親心竭

誠盡禮周熾元亦廩生事繼母如所生以上保德州

蕭熙載解州諸生順治乙酉避闖難父被闖投井號泣從之

並死焉妻蔣氏撫孤壽八十有四

劉日晏解州諸生姜瓌之變寇且至依父不去賊嘆其孝而

釋之比沒哀慕不忘八載不入妻室

楊攀桂解州諸生順治六年學政盧匾旌其孝

張譽安邑人運學諸生姜逆之變兄饒舒俱死於難覓尸歸

葬並贖其孤父年老悼傷二子譽朝夕侍奉力為勸解家計

窘而孝養無缺同縣張凝祐者年十九兵火後冒死尋親懷

金贖弟一時稱之

秦章夏縣人與兄文皆無子弟錦有子二俱幼已丑亂後餘孽夜肆掠章與妻馮棄其女各負一姪踰牆走免質明歸視女故無恙文諸生先爲賊殺至是錦亦烙死文妻及女皆掠去章泣訪所在鬻產贖之婚嫁悉資焉章後亦生有子

員鼎甲平陸諸生兄弟相繼死撫其孤曲盡恩誼

薛佩蘭芮城廩生父病日夜侍勞瘁卒同妻並稱孝烈

史恂解州歲貢任蒲縣訓導事繼母孝弟早卒撫遺孤如已出祖業盡歸之又州人王肅馬貽塾並以孝友著

王甯錡解州人事母盡孝子鼎瀉諸生侍母疾六年不倦母沒廬墓三年

景昃安邑人孝友溫恭張弼舉人平定州學正喬攀桂丁繩

武並諸生及李金章陳奇略均以孝著

路應元安邑人由貢生任潞安訓導事繼母如所生張鏐舉人張奎廩生並以孝事繼母聞

郭纘汾安邑增生潛心經學敦尙實行居親喪水漿不入口者七日歉歲設廠煮粥以活流亡

薛輝性安邑人父病劇割左臂以療之又有王祥者亦割股醫母縣令俱匾旌之

許其毅安邑諸生父年躋百齡始卒孺慕不衰居鄉多行義郭用疑陶暹並諸生與縣人任思禹俱以孝稱葛健及弟偁相友愛並孝於親劉宴亦篤於孝友子孫多以科名顯張存誠運學廩貢父弔舉人以孝友稱存誠工詩善書父沒京邸撫棺一慟遂不起

薛林德夏縣人割股醫母里人記其事於龍泉寺

張濟民夏縣人性儉朴篤友愛督弟潤民讀書力耕供給潤民官河南學使齋送俸金悉封還之勉以居官清白壽至八十四人以爲二難祀孝弟祠

王連科蔡珍並夏縣舉人官教諭與進士斐家鐸並以孝友著

趙甸平陸廩生生有至性七歲喪母擗踊如成人事父及繼母曲體志意父沒治喪致哀盡禮著有省身記及喪禮辨  
姜澤父母沒廬墓三年墓旁有井人呼曰孝子井

郭專城平陸人敦行孝弟郭淑董鄧亮杜化豹並以孝友稱  
武舉鄧桂林亮猶子也亦有孝聲

李甲捷芮城人與妻韓氏俱有孝行父母繼逝幼弟三人胥



繼母出也夫婦訓養備至甲捷老無子爭迎養及卒各立木  
主祀之又任家珩以孝著卒祀鄉賢

王永慶芮城諸生父病吮疽沒廬墓六年母喪哀慟成疾卒  
拔貢陰澤舉人陰汝宏歲貢王建侯諸生孫逢吉廩生王爇  
及縣人范名世曾拱微蕭公佐俱以孝聞

陳居仁解州人家貧負擔爲業父嗜酒日進杖頭錢以悅其  
意遇醉時或加笞捶跪受不敢忤與弟居信友讓人呼陳孝  
子李霖宦家子也董其鈿諸生亦以孝聞

孫雲鶴解州諸生幼孤奉母至孝母盲復明人稱孝感曹淵  
深繼母病痿目復瞽侍養盡孝

李鳴璋解州人少孤力田事母善處兄弟不知嫌怨不較資  
財母喪悲痛成疾乾隆中州守趙欲旌其門力辭不受

人耿復恭五世同居侯永衍范秉正張士彥及弟士品並以孝友爲鄉里所推

副貢李廷標諸生張煊李希晟雷時呂叶宮及雷恆呂叶商王建興王建盛蘇培湛並州人俱以孝友稱

牛士遇安邑人兄士通嘗遠出不知所往士遇千里求之不避險阻五年始與俱歸子湛澤相敬讓有父風澤子問仁中乾隆癸未進士又郭允張與弟允宜並諸生亦以友愛稱

楊林峰安邑舉人篤於孝友士曾淑由貢官建平知縣與張雋並有孝名

州同康行傳王統緒諸生丁鳴羽長沙知縣王修德黔西知州張份並安邑人俱有孝聲縣人揚擇善事繼母柴成林事瞽母撫孤姪並爲族黨所稱

呂儲夏縣舉人任洪洞教諭乞養歸事親竭誠盡禮張文紹以貢司訓清源親老歸養亦以孝稱歲歉出粟賑饑

姚璞郭宏運並夏縣人俱割股愈母疾

郭運福夏縣人父沒繼母呂以貧欲改適福牽裾泣請丐食養母呂感其誠遂矢節歷數十年事之如所生母卒喪葬皆盡財力鄉里稱之以孝旌

申羽蘇肫仁並夏縣歲貢與州同馬捷諸生何大有賈雍毛周裔裴可法王景舜何書郭如陵鄭紹芳劉超熊姜致遠俱以孝友聞張鵬飛武生家六世同居

賈亮夏縣監生孝行爲鄉人所重同時以孝稱者又有曹暉師型楊馨馮含章王志學任相君趙景禹劉國彥張學德郭盛王永盛諸人

荆永貴平陸人孝友克敦以子貴封奉直大夫同縣歲貢李  
一鵬員掄升諸生郭和鑾毛中立柳長壽喬建倫荆操趙琛  
喬爾紹及毛成立范棟杜樞石維坊趙麟瑞並以孝友稱  
李天仁芮城人侍繼母張孝待弟友愛乾隆中旌增生王者  
佐亦善事繼母

郭丕蘭芮城人母段病痿左右調護二十餘年不怠父目盲  
焚香露禱常以舌舐目復明推產讓弟卒年九十五乾隆中  
旌子含章後亦以孝旌

監生姜寶南諸生劉作翰楊夢麟趙利賓趙作賓楊廷鳳並  
芮城人以孝友著李苗增貢孝事繼母出粟賑饑荆林背善  
事其兄監生楊天喜及胡遠陸廣疑員振都皆善撫其弟姪  
者也

李應選解州歲貢事母盡孝周恤族黨著有西林講義  
馬鍾冀解州諸生母病嘗冀聞者欽感卒以孝旌入祠

譚昌言解州人事親至孝精於醫著有內經知要舉嘉慶癸酉鄉試第一

李廷模解州人性純孝母卒庀山木爲棺具暴雨爲山潦衝沒竟無恙舉人王貽塾及孫輝澤並事親克孝里黨交推

文梓安邑人父卒遺腹生母丁苦節鞠之事母色養倍摯以家廟遠在汾州舊籍霜露興感捐貲別建祠舉族欣慰

郭其章安邑人父沒魯山徒步扶輓雪中足皸裂血出不少休歲饑借弟違繙遇鬻婦者傾囊以子徒手歸自歷藜藿冥如也後由舉人官臨汾教諭

文定邦安邑監生出嗣於叔嗣母嚴厲定邦與婦周事奉惟

謹一日母怒婦令定邦鞭之復怒鞭輕責並跪憤憤而寐值大雪比醒雪已盈尺子婦雙跪如故怡然無忤容聞者感動文均安邑監生祖母失明每晨起輒舐之數年無稍間外出則令妻劉代舐久之竟能覩物人謂孝感

馬映鎔安邑監生性極孝父病諸藥罔效情迫嘗糞覺味變哭語兄弟曰父病恐不起矣尋卒又從九褚立業亦因父病嘗糞與鎔並稱

衛百行商學諸生母沒慟泣因之病日未幾父患風痺侍湯藥衣不解帶者期年居喪以毀卒

李跟顛安邑人幼孤事母極孝母病欲食肉割股肉烹以進適舅至見血痕察知之遽告其母母驚惕汗出而愈

監生楊忠孝事瞽母遊擊張肇業博士關金鐘及楊文慶陶

永泰皆善事繼母書吏王克鳳府經郭琳蔡天恩歲貢柴續  
祖皆善事孀母王綬景賓政解士志宋際昌蔡聯貴王利用  
恩貢劉宅吉監生趨好義均以孝友稱監生靳爲政撫弟文  
蔚友愛備至弟成進士子良臣亦舉於鄉

李友白夏縣歲貢侍父疾克盡孝養諸生馬欽父瞽母復病  
痿侍側不頃刻離調護甚至又千總蔚應觀及郭尊聖毛忠  
敬並善事親疾

張司烜增生崔彬廩生並夏縣人事繼母以孝聞

賈麟書夏縣人襁褓失怙事母盡孝受讀於兄麟英弱苦致  
疾兄沒慟悼加劇亦卒摶謙其從子也嘗割股愈母疾  
劉夢元夏縣拔貢少孤事母至孝奉兄克敬又張維誠以孝  
友獲旌

張清漳夏縣人陝西縣丞母老乞歸弟清瀛令溫縣母就養焉因亂護母歸里道垣曲遇賊備歷艱楚垣人重其孝行諸生張增監生張震泰並夏縣人與張凌雲並孝事繼母常銘績歲貢與諸生高向辰監生周希元事親並稱善養監生裴遇春及張翀洲尉步元皆孝其親友于兄弟廩生張從龍武生吳定風附貢張志純與張志廣俱以孝友聞柴動者幼孤孝事祖母從九張迎武能恤其弟者也

楊所博平陸諸生父年七十患石淋痛楚欲絕每溺時所博輒接以口力吸之石出病尋愈子兆元亦以孝聞

喬連第平陸人以縣丞注選三姪一子乃四分其產做范文正公義田之舉人以爲難

陳其蘊芮城人乾隆甲午舉人



欽賜國子監學正幼孤母教之奉事甚謹母有言輒條記之  
彙成二冊同治中以孝子旌入祠

許紹玉芮城買人也母病竭力侍養居喪哀毀成疾卒

李毓寶芮城人事繼母陳甚孝母病劇割股以進病尋愈

陳寶芮城諸生事繼母楊至孝弟妹皆母出也竭情撫育舅

氏負五百金曲體母心出其券焚之監生王體松孝養祖母

諸生吳廷照奉侍庶母皆以鞠育之恩情同罔極云

楊維楸芮城人賦性朴實以忍讓爲家法八世同居鄉里欽

慕當道匾獎其門

董永訓芮城人家極貧傭工奉母窮冬時嘗忍饑爲母具羹  
母見其瘠問之則以他詞相慰母卒之次日哭泣死終身不  
娶竟無嗣里鄰公舉孝行知縣洪以死孝匾旌其門

韓允五芮城人父病淋以口吮溺者五十餘日王永慶諸生父病爲吮疽沒廬於墓及居母喪哀痛成疾遂以毀卒又關金者幼喪母事父極孝父沒亦以毀卒

李名杰芮城人父見龍居鄉多行義名杰性至孝父病危輒嘗糞感泣額天祈代及沒值荒歉不能成禮因停柩于家苦次三年哀慟不已

薛元望芮城諸生母病痿每出外必躬負之左右奉養不懈及沒守柩三年監生張向離母癩癩禱於天四十餘年不茹葷酒母尋愈李金義侍瞽母亦以孝聞

孫麟現芮城諸生與縣人張應中李開基俱以孝友著監生張允瑞以孝旌諸生薛德耀及蕭悅成並善事親李芸厚葬其母盜將發之感異夢急趨母墳得免孫宣少爲秦兵所掠

思親日夕涕泣至廢飲食主者憐之放還

以上解州

董復真聞喜人事父嘉德以孝聞父爲族人承公所殺訟寃論抵比闕賊破縣獄囚胥逸承公出入自如順治八年復真猝遇於田畔徑往撲之仆諸地出利斧斷其手足承公死詣縣請罪縣令鄺搜前案覆視獲免

甯世燧聞喜人明季逆闖追餉拷掠其世父二翰甚慘爲代輸二千餘金脫其難

賈鼎聞喜人父雲鳳順治間嘗率鄉勇勦土寇爲巨匪李鬍所殺鼎痛憤時藏利刃圖報突於東嶽廟遇李大呼直刃其胸取首以祭父詣縣自首邑令壯之匾旌爲烈孝

周承統河津歲貢常避兵負母山中幼子被害不顧歲荒奉親甘旨不少缺人稱其孝

張養心絳縣諸生幼孤奉母馬以孝聞母被賊執棄水中養心亦被縛號呼爲母乞命賊感而釋之

孫尙書絳縣人順治六年寇起棄妻子負母避難中途遇賊劫以行將殺其母以絕內願尙書冒鋒護母遂被刃死賊感其孝因釋其母

馬時泰絳縣人兄弟友愛食必同案崇禎末歲大饑出粟賑饑有義聲子機事之甚孝姜瓖之亂時泰爲賊所劫機號泣追至中途願以身代賊感其孝父子俱釋同時劉化育者方侍母疾賊至家人走避獨依母不去賊歎息戒其黨勿犯後舉辛丑進士官湖廣守備

譚經世垣曲人父汝英明季官居庸關經歷流賊犯畿輔不食死經世方總角貧不能歸傭身二十年扶櫬旋里

張秉瑞垣曲增生順治初土寇竊發父被執秉瑞年垂髫負  
金詣賊營匍匐號救賊義釋之

侯居才絳州人年七歲隨祖母張入山避寇張誤墜山谷居  
才環崖號泣側身投下抱祖母臥踰兩夕垂斃家人尋救獲  
甦事母米氏與妻張並以孝聞母年九十七乃卒

李世和絳州人父沒於蜀徒步數千里尋父骸負以歸

馮永絳州選貢五歲時避賊從母家樓上聞城陷驚呼曰我  
祖父危矣遽隕身下從母急持之得不墜後官壽陽教諭事  
親及兄孝友彌至

吳道煥絳州人康熙己未進士少孤事母孝家貧好學與兄  
道昌相師友事之甚謹官至戶部員外郎又武進士王瑾亦  
善事孀母以母老悼遠離絕意仕進敬世父尤至

楊園絳州諸生有學行事母至孝敬兄愛弟人無間言

李獻可絳州歲貢善居親喪推產於弟李凝祚以歲貢官昌黎知縣亦以孝友爲鄉里推重張鬱修府吏也事繼母以孝聞郝啟五世同居

王鍾靈聞喜人順治戊戌進士選翰林院庶吉士累官至侍讀性篤孝十一歲居母喪哀毀如成人繼母丁性嚴事之甚謹丁亦愛之盜嘗夜入室逼父母寢鍾靈亟起持長矛往格仆其一人羣盜攢刺中十餘槍幾斃通籍後乞養家居捫舌循牆不敢少軼越而郡邑利病輒力言里人感之

牛化麒聞喜諸生童年喪母事繼母孝昏定晨省終身如一日母疾親嘗湯藥及卒哀毀骨立人皆以爲難云

程貞儀布政使鳳翥子以恩選觀政工部辭歸侍父從入闕

以父命旋里壽祖父事竣而父訃至萬里歸喪抵家母復卒  
喪葬畢咯血而死

趙儻聞喜諸生父沒悲號淚盡漚血著衣皆赤三年不入內  
事繼母無異所生又楊登亦諸生與李敦並以孝事繼母稱  
王綺父客死於外匍匐二千里負骨歸葬公舉孝行

楊華業聞喜銅工日營升合事父母每食必具甘旨自啖菜  
羹終父母身如一日鄉人稱其孝

趙加爵聞喜人幼隨父以醫遊蒲解間得米負歸養母母病  
痿艱於食與弟加品扶母跪進爲常越歲父復卒貧愈甚乞  
食以養凡七年母終廬墓朝夕哭拜舉孝行授甯遠巡檢

孫廓聞喜諸生康熙中大饑奉母就食於豫渡河舟沈母子  
俱溺須臾抱母出得救俱無恙後僑平陸資授徒以養兄客

死河南百計扶其櫬以歸

朱琚聞喜人幼嗣叔森後叔復生二子家漸窘乃廢學躬耕以養叔病痿出入背負歷三年不怠弟授室後賈於外十年不反琚年及六十矣羸糧徒步由豫入楚轉至蜀訪得攜歸晚築小室傍親墓居之年八十九無疾卒

孫開元聞喜人母楊氏病篤割左臂肉沃水以進母尋愈又楊玉極嘗割股療母

賈光觀聞喜諸生母病喜按摩卽習爲折枝之技一夜恆數起及病劇籲天請割已算延母壽未幾果卒年二十一

王度鄜聞喜人母病痺奉養十三年無倦色當父沒時度鄜方九歲及母卒合葬啟父墓哭臥壙中七晝夜如初喪然

葉永新聞喜歲貢與縣人趙含光並孝養父疾孫淑謬事繼



母如所生孫建美嘗拾遺金亦孝於母舉人崔毅孫開緒諸生孫郿並以孝友著柳星耀趙著皆友于其弟

吳紹先字伯宗稷山人少讀書略解文義十六歲父母皆亡有二弟季年十一與從兄偶出遂絕蹤又數年仲以博塞失負逃紹先負販以迹之南出襄洛西歷劍州東至黑龍江積十六年卒同時而得之初遇季於京師爲高氏僕高感其義許之歸時已微聞仲在甯古塔乃留季而自往求仲舊都郊關出入有禁限紹先率以計達至則仲果在甯古塔豪家以情告豪不許乃冒公人入軍府訟軍吏庇豪欲威懾紹先以應對失儀捶其面血淋漓紹先辭愈強直且言還京師顛聞吏懼卒白大帥持其弟以歸時仲冬冱寒夜經大臥磯行者皆墮指紹先與弟相推輓顧而曰此中人未有如吾樂者也

比入塞爪甲爛脫無存者至京師待季偕行知其事者爭傳說公卿間相國陳文貞贈詩七十韻李文貞爲書事多就而禮貌之紹先赧然大無以自容衣敝履穿或贈貽終不受杜士則稷山人少有至性事父母嘗冬月温被如古人事雖細微必請而後行無敢專者親沒遇有事猶跪告主前如生時年幾七十言及父母輒孺子泣不止

高大在稷山歲貢早歲失怙父病痿左右就養衣不解帶者三年嘗倡建宗祠遇親忌日泣奠盡哀康熙丁丑土寇作亂脅之同行以死爭之衆知其不可奪尋引去

張靖一稷山人康熙戊戌進士孝友醕篤以親老不仕授徒以養足跡不履城市人高其品王佩玉張鵬翥並歲貢俱以孝友稱又縣民史絢五世同居

甯獻誠河津歲貢父令高密卒於官扶櫬歸號泣不輟悲感行路母沒負土成墳廬墓三年官夏縣訓導

任養輝河津人家貧事繼母周孝母病藥需柳芽值冬月以熱水沃樹泣禱竟得之又以母命赴山拾橡子天大雪凍僵遇救得甦泣曰不得橡子何以見母卒取以歸

呂從吉河津諸生以孝友著甯維翰事親居喪有純孝稱

王錫絳縣人家甚貧父聘士陝西同心驛驛丞到官未幾卽沒錫典衣裝以歛馳歸鬻產迎櫬時沍寒父同官蕭守備請埃春且代乞賻卹力辭卽日就道晝則躬挽夜則露宿柩側抵家墜指裂頸無復人形見者酸鼻母喬氏臥病二年奉事尤力比沒哀慟幾絕邑令盧將表其孝固辭卒後獲旌

陳佐周絳縣人童年喪父柴毀幾殆父所性故選貢經史胥

有論著見手澤輒涕泣不止事母李氏尤謹嘗徒步訪醫遇盜將殺之虎忽出叢薄間盜駭遁虎亦逡巡去母沒寢柩次三年不入室嘗建宗祠刊族譜人謂能守家學雍正中旌尉弼王絳縣諸生父懷遠官甯波守備追剿海寇被殺賊投其尸於河弼王聞難卽奮身入水抱父尸沈浮數四遇救乃出旣斂與弟翼王扶柩歸葬畢廬墓旋以毀卒翼王亦以孝友稱事嫂撫孤情誼甚篤

范繼純絳縣人事繼母以孝聞居喪廬墓子章亦至孝母病草水漿不入口未終喪以毀卒

白玉梁絳縣人力田養親兄玉璽外出久不返母念之甚玉梁蹤至南陽與兄偕歸中途爲盜劫又遇虎輒以身護兄會有天幸不死抵家母方病醫藥罔效割股以進母尋愈其後

有王自忻者亦以割股療親聞

郭百仞絳縣恩貢事親純孝父以疾忌鹽百仞亦隨父淡食  
一年母患瘍親爲吮膿遂得愈

董攔門垣曲農家子生有至性總角爲人傭工日得數錢輒  
以奉父母年十四父病無錢營醫藥徧禱祠廟聞父痛楚聲  
淚泫泫下走庭中伏地曰請斷指以代父痛語訖舉斧斷三  
指血流滿前暈幾絕觀者胥感歎父病尋愈縣令區旌之  
魯聖裔垣曲武生父沒於京邸徒步扶柩歸雖露處晨夕必  
泣奠比葬哀毀成疾邑人稱之

趙連元垣曲增生少孤事母孝母卒號泣不絕遂致目瞽

趙凌昊垣曲廩生傭書養母母卒痛哭成疾死又王翊中居  
父喪以毀卒張貞明孝事繼母亦以哭母不勝喪死

車閔御垣曲恩貢父病嘗糞比沒哀毀骨立

文登垣曲歲貢親沒廬墓三年撫幼弟教養兼至張金錄楊  
枝溶安亦昌並歲貢與舉人劉敦化俱以孝友著舉人車耀  
遠諸生張篤恭並善侍親疾久而益誠拔貢安漢鸚廩生張  
亦恂諸生張化鵬文茂檜文必慶劉夢麟並事繼母以孝聞  
諸生王元凱艾夢熊並以愛姪如子爲里黨所稱

閻守瑞絳州人父大江有義稱事之得歡心愛諸弟尤摯一  
錢尺布不入私室治家整肅婦孺悉循禮則督學嵇嘗旌之  
王泐絳州人家極貧父卒繼母遇之苛泐委曲求全妻段氏  
不能堪自經死里人大譁咸欲與母爲難泐外排衆議內寬  
母懷終不以妻故而傷母志也弟二皆母所出厚待之

薛呈烈絳州人幼孤事母盡孝母多疾侍寢席八年不入私

室子漢旭漢武相友愛皆善事親學使戴以世孝榜其廬

王萬春絳州歲貢生未離襁褓父以與母反目忿而出亡稍

長詢父所在母不肯言既為諸生娶有婦訪知父在蜀往尋

越歲乃偕歸內外調護卒致父母倡隨如初孝養終身

唐景瑤絳州附貢侍父疾居母喪竭誠盡禮兄沒嫂呂氏矢

節事之維謹乙巳歲饑糴粟賑濟村人賴以活者千計

李養亨絳州人兩事繼母均得歡心父卒廬墓三年獲旌

段勵翼絳州人乾隆己未進士性至孝親沒哀慕終身任甯

武教授遇忌日及佳節必南向肅拜在官激濁揚清有聲

朱肯構聞喜監生事孀母色養備至待弟友愛嘗於故宅掘

地得二千金曰此先人所藏呼弟均分之又王份孝事繼母

多行義三弟終身同髮子孫守家法皆以孝友著

雷迎暉聞喜人父覺世官皇姑屯巡檢旣歸貧甚迎暉力作得直以供甘脆居近涑水乾隆時水暴漲迎暉負父而行甫出村室已爲水沒矣

梁廷吉稷山人幼孤事母以孝聞母疾急有告以割股可療者廷吉潛引刀割肉和藥以進疾良已知縣姚匾其門

梁維翰稷山諸生繼母性嚴承顏順志一日怒批其頰偕妻加氏跪告曰願母批不願母怒鄉人將公舉其孝因謝曰顯孝子而貽母以不慈之名罪莫大焉數年母亦化而爲慈張全德者亦以善事繼母稱

王積稷山人幼孤事母薛氏盡孝以庶祖母陸全節保孤奉侍維謹陸疾日夕額禱沒爲服齊衰三年

馬學良稷山農家子少孤貧服賈於陝忽念母卽棄歸母沒



廬墓三年每出必稟命墓左不異生時乙丑歲饑破產助賑  
汾水夏漲遇溺尸必買棺收葬之又朱正色亦以母喪廬墓  
韓相文稷山諸生繼母患癰醫技窮口吮之遂愈

史宗周任元統並稷山人鄉黨推其孝友史異教事父色養  
備至後舉於鄉

王英河津監生父母有宿疾奉侍之暇究心醫術術成而疾  
瘳兩兄先後感風痺多方以娛其志與侍親疾無以異也周  
恤鄰里甚有隱德縣令匾旌其門卒後鄉人勒石誌之

王凌五河津人事繼母以事聞郭光祖武生孝事其祖父母  
行義並爲鄉里推重

王德灼河津人親喪廬墓原大有由舉人官壽陽教諭少承  
祖訓祖沒結廬墓側三年不返私室

薛世訓諸生文清公裔也事親以孝稱尊祖敬宗倡修譜牒  
又奉祀生薛天章嘗重刊讀書錄行世

周守身絳縣人母病痿進膳侍藥七年無倦色以母疾廢學  
既終母喪執書問字遂精堪輿家言及星命之學年踰七十  
自刻死期鄉人異之

郭舒絳縣歲貢侍父疾竭誠就養喪葬盡禮奉繼母亦得歡  
心附貢郭其炳事母待弟咸稱孝友

文榎垣曲人遭繼母變父命析居攜妻子入南山力作自給  
得錢輒入城市鮮旨歸省父沒事母如故一日樵深山遇虎  
榎祝曰家有老母容一面當來此請死虎逡巡去旋入城饋  
母告以遇虎事母感其孝爲泣下歸而妻子相戒令無出然  
貧甚非樵無以謀食異日復至故處果遇虎踞枯樹下點首

頓掌而去似示令挖樹者試挖之白鏹累累攜之歸次早持以奉母方楸出門有老人臨所居窻頂徘徊久之曰此宅可惜來龍太緊若遇虎鎮宅則吉矣言訖不見俄來一虎臥院內舉家大驚楸妻曰汝等不記早間老人之言乎此乃神虎爲吾鎮宅耳適楸從城歸喜曰此仍山中所見之虎也乃焚香叩拜虎既去出金建祠山頂迄今子孫奉祀不絕云

趙歸晉垣曲人自其曾祖僑居開封數世皆渴葬至歸晉始負骸反葬畢偕母俱歸年已五十餘家貧足斃母老而盲日負行三四十里不知疲母沒喪葬盡禮人咸稱孝子安乾一者父客豫死亦以千里負骸稱孝云

趙從昭垣曲附貢性至孝工書畫嗜琴構雅宜園隱居奉母母九十餘從昭亦屆古稀猶依依膝下作孺子狀云

安臨淇垣曲監生母沒與父共寢席三十餘年乾隆中歲饑出粟助賑人賴以濟

安浚垣曲人生而跛隨父耕於山卒有虎至父被搏而踏浚躍崖而下虎舍父撲浚爲所噬餘一股越三日其父亦死趙雄飛垣曲廩生生有至性母病醫言糞苦則生否則死雄飛竊糞嘗之有懼色母知之泣雄飛亦泣母卒柴毀竟以孝殉先是其兄有顛疾夜狂走遇虎雄飛躡及以身翼兄虎竟去不爲害歲饑出粟賑活鄰里甚衆縣人亟稱之

陝飛鵬垣曲監生父病革焚香禱神割臂肉和藥服之父尋愈後復疾又嘗糞以卜吉凶事繼母奉志承顏亦得歡心云安緝禹垣曲農也其兄發禹有子四緝禹僅一子妻欲分爨不聽則累日絮聒乃僞與兄分而每禾登場則計口均給終

身推讓無芥嫌

諸生安塾孫大賢監生安茂齡並垣曲人孝友爲鄉里所欽  
諸生馬鏞王浚雲歲貢王其湘侍親疾俱以善養聞劉夢傳  
廩生孝事繼母席鳳林馮簡並孝事孀母鳳林又嘗拾遺遺  
金諸生文徵馬之騷及李月白皆善撫弟姪古誼可風

王怡桂絳州人由廩貢任陵川教諭父老乞歸色養備至居  
喪柴毀三年不出里門里有負債者貧不能養母焚其券復  
周之其人感泣卒以孝聞嘉慶初舉孝廉方正

王爾中絳州人生而孤母苦節鞠之稟母教力學爲諸生王  
辰省試甫終場聞母病兼程馳歸至家母已沒一慟幾絕榜  
發獲魁選以不克侍養痛之終身晚貧甚或資之仕不應  
王世俊絳州歲貢家貧授徒得脩脯以養母母失明奉事周

至性剛直人不敢干以私州牧呂亟稱之未嘗一至其署

吳蔚周履豫並絳州人親沒廬墓

郭富温絳州農家子也童年喪父母將嫁泣留弗得遺弟五人皆幼力田鞠之長年踰四十始娶妻生子丁丑大疫其妻欲棄子自養富温日不如留子以存嗣遂不食死張楊喜者家貧性介非其力不食傭工奉母甘旨無缺母沒竭誠營葬歲饑自知不免投井死楊棲鸞亦孝於母值大疫鬻產供食念將不給時忍饑留餘業以奉母久之遂斃逾月母亦死王專孝聞喜人父病劇割股和藥以進尋愈邑令匾旌之衛仁豐聞喜人舉道光庚子鄉試第一學問淵博年過七旬猶手不釋卷生三月失恃終身以不得事母爲憾臨終令家人以衰麻斂從之

陳嘉賓聞喜人居母喪哀感行路事兄如父道光丙午大饑出粟保全一村于濤衛千總弟死悲泣至失明羣從久析以業鹽茨致富召之至各畀千金俾立產

陳照聞喜歲貢事繼母以孝聞母生子遭縲絏憂泣不食照挺身詣縣請代服罪邑令嘉而釋之

張大成吉汝炎並聞喜人割股療母人稱其孝無異辭

趙君貴聞喜錫匠也傭工於豫歸而母沒一慟幾絕母故苦節未旌者哀戚黨勒石表之葬後築室墓側日夜號泣三年不輟又孫敏捷亦以父喪廬墓

王宏盛聞喜人母年踰八十疽發於背親為吮膿遂愈

宋秉友聞喜歲貢居親喪以誠孝聞王者香亦歲貢父謙諸生有孝友稱者香事母待弟嗣其家聲諸生王殿英及徐克

信並奉母克孝陳益通父客死甘肅崎嶇兵火間奉喪歸  
衛慶元稷山監生事親以孝聞奉嫡母尤謹道光丙午歲饑  
以母命出粟平糶既復罄所有以賑貧者

李滿倉稷山人中年喪妻貧以有子不復娶母老且病侍寢  
席二十餘年糞殮櫛浴悉躬任之

丁金和稷山歲貢家貧篤孝父中年雙瞽眼醫某善撥醫需  
甘金竭力措貸僅得其半醫者爲撥右目念父痛楚奉甘腴  
將愛敬淚如綆縻幾欲以針自刺代父受痛醫者曰余閱人  
多矣未見愛親如子者請並左目撥之反其金稱歎而去

丙孝子遺其姓氏織席以養父光緒中大祿輟業從父就食  
於秦已復東歸夜煖炭於室父被焚奮身撲救肢體焦灼弗  
顧也抵吉州乞食以養明年父病不起哀土人瘞諸義冢攀



號墓側三晝夜有憐其孝者扶入市與之食不顧竟哭死  
薛孀兒稷山人捻逆犯境負母避地途遇賊露刃脅之從孀  
兒戀母不離力格賊墜馬其黨大恚攢擊之死

楊佳橋稷山監生事繼母孝家中落值大祿力覓食供母母  
知之泣曰苦吾兒顧至此不食死佳橋大痛自是不復營生  
與妻子數口並餓以殉

賈憲江蘇靜菴王思禹諸生史秉南並稷山人敦篤孝友  
史維恭河津人捻匪擾境掠其父去追蹤尋訪徧歷齊楚竟  
不得遇號泣而歸終身悲慕事母以孝聞

柴世耀河津人母沒哀毀踰禮數日不食而死

李永財河津工匠也力作養母母年近九旬丁丑大祿將產  
供旨甘母不忍食則令子女侍分甘娛志母沒盡所有以治

喪具及葬佯入壙檢視遂自殺於母柩前

許道生河津監生侍親疾竭誠就養及居喪廬墓三年

翟明謙魏孔昭並河津人母疾竭力侍養楊文炳張逢時阮廷寶楊棟千總賀宸極並以孝友著

常天賜絳縣人母病思肉倉卒不得割股以奉邑令旌之

席滿澤絳縣人孝弟繼世自明中葉迄今十世同居

張自安垣曲人家赤貧母病思肉割股以進

普廷琦垣曲恩貢生而失恃叔母譚鞠之長卽嗣爲叔子承

顏愉色至老不衰居喪哀毀盡禮觀者感泣

李樹公垣曲人繼母趙性嚴厲事之維謹母亦加慈母疾年餘侍養弗懈及沒哀毀骨立

楊彰垣曲監生事親孝友于昆弟捨逆之變爲賊所掠子受

田武生夜入賊營徧尋得之負行十餘里而歸

魯郁文垣曲增生髮逆鼠垣大母與父停柩在室郁文命合家俱逃獨護柩不忍去賊至不屈而死同時魯從天隨父避地遇賊驅以行力護父亦為賊殺又王汝弼者曾祖母病瘵賊至家人走避汝弼侍疾不忍離賊殺之

馬佩瑜垣曲人童年尋父恩貢陝之京及劉鎮充俱以竭力侍疾聞廩生文蔚武生李奪秀並孝親愛弟鄉里同欽從九王步京善養母志歲貢席陳殿昆弟七人以友愛稱以上絳州

劉代興隰州人父爾裕諸生以孝友為鄉里推重明崇禎六年流寇夜至攻城隨父登陴守衛城陷父墜城傷股代興奮身躍下負父遠避父子俱無恙後由貢授訓導未仕卒李呈蘭隰州廩生父罵賊遇害母牛氏誓欲殉節三蘭泣諫

而止侍養歷四十年母沒哀毀幾絕既葬廬墓側終制惟食  
飢粥劉桐亦廩生工書晝母服既除終身哀慕不復茹葷

牛星隰州諸生事繼母盡孝待幼弟教養備至又廩生劉清  
雅克敦孝友拔貢呂黃鍾官渾源訓導事親以善養稱

馬毓秀大甯廩生事親竭誠就養親沒絕飲食七日寢處苦  
次三年不出戶與弟儲秀同居五十餘年及析產盡推膏腴  
讓之學使屢獎其行

習權大甯恩貢奉母安氏色養備至事兄以恭遇弟姪患難  
出爲周旋明季流寇破城倡築阜城寨守之積勞至成疾縣  
人衙爲固保全甚多後以貢考授通判未仕卒

馮聖真大甯人家甚貧客作以養父每饋食至不敢先嘗必  
疾趨執爨供父食乃還傭所或饋食少腆則擲歸以食父主

者知之復以食饋聖真堅不肯曰焉有一人傭而兩人食者  
比父卒負土爲墳哀毀三年邑令匾旌之然聖真故無廬匾  
懸關廟之左廊

張文典大甯人父母皆善病竭力侍養歷久不懈居喪不苟  
葷酒者七年

諸生劉必大張二美安萬邦並大甯人與馮案尙應舉皆友  
愛於弟歲貢安統曹繼祖並善撫兄子安挺亦歲貢禮葬世  
父母恩恤羣從梁忠賢李雲楚喬雲鳳侍疾居喪以孝稱  
賀天修蒲縣諸生祖母與母皆繼室不相得天修曲意承順  
偶遇勃谿諍語率家人長跽引爲己罪俟相悅始起後皆化  
爲賢良子孫十餘人盡列膠庠人以爲孝德所致云

曹力勤蒲縣人家貧善養歲凶拮据謀二餐時不飽而奉親

未嘗缺甘旨父病禱於神願以身代父尋愈而力勤竟如期  
死人異之爭弔其室無不流涕者

曹力大蒲縣人道光乙酉拔貢事叔苴甚謹叔無子生養死  
葬皆克盡禮官祁縣教諭未久歸閉戶靜息人高其行

安澄大甯人由拔貢授徐溝教諭事繼母賀以孝聞居喪盡  
禮許光旦廩生母病額天祈代居喪柴毀每食必薦三年杜  
門不出邑令嘗旌其閭

劉光先大甯諸生事繼母色養備至時人呼爲劉孝子

賀琦大甯歲貢母雙瞽每進食必問所欲親自哺養終身侍  
側承歡罔懈

歲貢張琮大甯人事親先意承志時稱純孝諸生李若星庾  
廷案楊鵬飛均以友愛稱又曹千端者親沒事祖盡禮

劉而芳永和廩生好學克敦孝友祖卓彥父永譽並有行誼  
時稱爲三世人物段爾章亦廩生兄弟終身同爨友愛爲鄉  
黨所欽又諸生白士明亦以孝友聞

張熊蒲縣諸生事親盡孝父沒母老艱於步履授杖滌器未  
嘗一日離家貧恐貽母戚時嬉戲以娛志熊年七十九病卒  
母將百歲矣臨死以不得終養爲痛仰天大號聞者歔歔

曹偕蒲縣恩貢侍親盡禮母沒父以老不復娶與同寢席十  
餘年又監生張克岐襁褓失怙事寡母曲意承歡至老不懈  
曹載輝大甯增貢幼孤母王夙有顛疾護持甚至能視聽於  
形聲之先疾遂不發又嘗患瘍口吮膿血亦愈咸豐間偶以  
事至襄陵忽心痛急奔歸則母聞平陽有變方泣念時也居  
喪盡禮治家雍睦撫伯叔子女如所生

郭奇富大甯拔貢事親純孝與從兄同居友愛無間武生張

意誠少孤貧事母王亦以孝聞

以上  
隰州

劉有恒霍州人父一達明季爲張五倫所戕張擬絞以闔變  
得脫順治三年有恒遇於賈村力鬪斃之自具桎梏請罪官  
廉其情釋之

張龍麟霍州人幼得父母歡心比長以善養稱父沒廬墓側  
朝夕拜哭高岡之上甘泉湧焉服闋歸侍母泉旋溷母沒復  
廬墓泉亦復湧當時謠曰泉流兮泱泱誰能飲兮孝子之血  
又曰泉流兮淫淫誰弗飲兮孝子之心諸生劉砥中居父母  
喪亦先後廬墓六年

安養已霍州人家五世同居孝事父母弟病篤禱神而愈念  
弟乏嗣祈之神得子人以爲至誠所感



周錫衮霍州廩生以孝弟稱於族黨安承教亦廩生與州人  
翟果進並孝於親監生劉恒耀以善事繼母聞

衛廷鑿趙城諸生幼讀子游問孝章卽領悟父母食必正立  
侍人奇之父授徒平陽月必往省一夕忽心悸急趨視則父  
疾矣父曰昨夢汝今果至越日病瘳會疫作夜聞空中呼曰  
勿犯衛孝子如是者三是歲村人多死亡其家獨無恙

王昌緒趙城廩生事父以孝聞父娶繼妻四色養如生母父  
病篤顧其弟昌齡昌鼎有憂色昌緒悉推產讓之

郭洪圖趙城歲貢以孝行獲旌湯任賢亦歲貢事繼母色養  
交摯弟作賢諸生母所生也克恭於兄又廩生高鵬飛事祖  
母及繼母並以孝聞

衛廷璧趙城恩貢事親至孝授徒平陽康熙癸巳地大震先

得異夢告以臨難必免次日城市傾圮獨所居無恙人稱孝感卒之日盡以餘貲給兄弟之子遺子孫者書數篋而已閩西來靈石人本姓劉閩民載之養子也民載夫婦相繼沒有子二皆孩提舅氏姑母各攜其一以去實不能育也西來爭之不得則枕門長號三日負之而歸躬自鬻炭以贍二孤衣食比壯爲成家室

王之度靈石人明季舉於鄉闈賊逼仕誓死不出其母牛氏故以節著時訓以大義之度奉之維謹

國初授鄖陽府通判有惠政乞歸終養卒祀忠孝祠

劉強靈石人父病割股調藥旋愈以孝行獲旌

王湛初靈石人家貧事繼母曲盡孝養弟傭販直隸負債鬻其身湛初尋至賣子贖之其主廉得情大感折券並值還之

曹爾仁靈石人侍母疾歷久不懈母沒廬墓三年歲凶與其弟爾信爾禮蠲賑並開曹家嶺河鄉人欽感又張星燦與弟星燦並孝於親

牛希顏靈石人與弟宗顏俱諸生三世同居均以孝弟旌監生曹魁英吏員王風美皆克敦孝友亦旌入祠又縣人王璽與其弟善事繼母友愛無間王子庭監生撫姪無異己子

閻吉兆霍州人父文玉爲閻文清所戕依律絞父柩亦淹文清家後文清赦免吉兆伺間糾兄弟伏文清門外佯好語誘之出羣起擊立斃叩辭父柩前詣州陳父仇旣復甘刑戮不辭州牧爲援例上請得減等

任道統霍州諸生有異母弟童時爲人陷誘流落遠方道統遍訪十年得歸武生張習亦嘗訪得從弟均產給之

薛洛霍州廩生事繼母極孝母愛之亦如已出學使匾旌其  
廬翟廷瓚亦善事繼母弟五人待之有恩誼

安彭年霍州人祀孝弟祠衛讓侍養母疾稱純孝監生薛璉  
恩育諸弟義周族黨

賈愈良趙城人侍繼母疾手承唾皿親滌溺器湯以理事父  
劉文光事母皆似之張憲父脅發疽舐之愈

王夢尹趙城人母善病投以藥病轉劇泣曰爲子不知醫令  
母委頓至此非孝也乃遍覓岐黃術遇異人授以方脈卒爲  
良醫母病旋愈

劉純陽趙城諸生父沒廬墓三年劉登第居繼母喪亦如之  
張延璧趙城人以縣丞注選讓產昆弟人異之衛誥張錦亦  
類是又有監生賈學潮廩生王嘉誥歲貢申臺諸生盧永興

及賈翮張寬楊溥皆能恤其弟者也

劉文光趙城諸生事親居喪如禮撫兄子無異己生乾隆初舉孝廉方正

張遴趙城諸生爲世父嗣父鄉居暴疾遴聞之馳往涉汾水中流幾溺若有人起者父病旋愈

監生楊耀麟趙城人孝事繼母諸生高蓬山衛樹譽監生王廷詩賈元烈及李逢源楊楚齡高大爵並以孝友稱

王夢鵬靈石諸生父母繼沒廬於墓側歲歎出金賑濟楊士藩貢生父卒哀毀盡禮嘗設義冢乾隆間以孝義旌

薛宣靈石人家貧傭工事母先意承志

曹奎靈石人父病瘞醫云得親人肉可療乃自割左股託辭進之病獲痊

程範靈石監生及劉敬並篤行孝友爲鄉里推重梁持諭邢孔有事母並以孝聞

任開泰霍州人舉孝廉方正道光初旌表

韓配庚霍州諸生少孤母王氏苦節鞠以長事母猶孺子也爲句讀師館於遠村母暴疾死匍匐號歸淚盡繼之以血及歛椎棺大慟腸絕而死州人哀之

朱彝信霍州人少孤事兄甚恭兄病篤爲具棺身臥其中祝以已代以兄一子早夭一子又失明已有三子死可瞑目後兄病漸瘥不逾月彝信竟無疾而死學使黃區旌之

王儒誠霍州人生甫免乳父廷獻客遊無耗長欲尋父而莫知所向禱於神西行吉遂歷關陝徧蹤不得困極而病夢有語以往甘肅者卒遇之山後偕歸

韓如標霍州人父喪廬墓三年事繼母孝州人稱之

周祥麟李馨遐並州民也及諸生蒲繼業事繼母如所生諸生王朝桐善事其兄翟天中亦如之諸生任永敏監生程學道吏員程蘭皋與郭景融李自讓皆能恤其弟者也翟蘭蕙增生事父孝孫福貴少孤事祖母及母並得歡心

張攀月靈石人以貢官祁縣教諭少孤力學會輯先人學行爲見聞錄每展讀輒流涕事諸兄甚謹程體常孝事嫡母與兄履常相友愛時稱二難由進士官禮部郎中又縣人梁元杰亦善事兄

申國佐靈石恩貢父有顛疾嘗受杖不敢避張佩賈人子也事瞽母亦以孝聞

梁給章靈石人少失恃庶母張撫之事張甚謹好施予嘉慶

乙丑歲饑出貲賑濟工詩著有懽岩集

梁繪星靈石人事繼母閻以孝聞居鄉多義舉中簡其族子也善居父喪與弟友愛歲歉竭力助賑

王來詔靈石諸生事繼母孝嘗出資賑饑監生王執璠善承父志事伯叔父母喪葬盡禮張炯早失怙恃奉族母如母焉

以上霍州

右諸州屬三百九十四人又三百四十八人附見



